

UDHËZIM I PËRBASHKËT

Nr. 650, datë 13.9.2019

PËR PËRCAKTIMIN E KRITEREVE DHE PROCEDURAVE PËR PËRZGJEDHJEN E PËRFAQËSUESVE PROCEDURALË PËR FËMIJËT NË KONFLIKT ME LIGJIN, FËMIJËT VIKTIMA DHE DËSHMITARË NË PROCESIN PENAL

Në mbështetje të pikës 4, të nenit 102 të Kushtetutës së Republikës së Shqipërisë dhe të pikës 4, të nenit 49, të ligjit 18/2017, “Për të drejtat dhe mbrojtjen e fëmijës”, ministri i Shëndetësisë dhe Mbrojtjes Sociale dhe Ministri i Drejtësisë,

UDHËZOJNË:

1. Qëllimi i këtij udhëzimi është përcaktimi i kriterëve dhe procedurave për përzgjedhjen e përfaqësuesve proceduralë për fëmijët në konflikt me ligjin, fëmijët viktimë dhe dëshmitarë në procesin penal.

2. Përfaqësuesit proceduralë kryejnë përfaqësimin procedural të fëmijëve në konflikt me ligjin, fëmijëve viktimë dhe dëshmitarë në procesin penal në përputhje me parashikimet e ligjit nr. 37/2017 “Kodi i Drejtësisë Penale për të Mitur”.

3. Përfaqësuesit proceduralë, ushtrojnë funksionet e tyre kur kërkohet nga organi procedues, duke i shërbyer në çdo rast interesit më të lartë të fëmijës në konflikt me ligjin, fëmijës viktimë dhe dëshmitar në procesin penal.

4. Njësia për mbrojtjen e fëmijës harton dhe përshtat, një herë në vit, listën me përfaqësuesit proceduralë për fëmijët në konflikt me ligjin, fëmijët viktimë dhe fëmijët dëshmitarë në procesin penal.

5. Në listën e hartuar nga njësia për mbrojtjen e fëmijës gjenden të përcaktuara:

a) emrat e personave që janë përzgjedhur për të ushtruar përfaqësimin procedural të fëmijës në procesin penal;

b) njësitë administrative përkatëse që mbulojnë përfaqësuesit proceduralë. Një përfaqësues procedural mund të mbulojë më shumë se një njësi administrative;

c) adresat dhe të dhënat elektronike të kontaktit të tyre. Për çdo ndryshim të mëvonshëm të adresës dhe të dhënave elektronike të kontaktit të tyre, përfaqësuesit proceduralë detyrohen të njoftojnë njësinë për mbrojtjen e fëmijës.

6. Punonjësit e njësive për mbrojtjen e fëmijës në bashki dhe njësi administrative, mund të kryejnë rolin e përfaqësuesit procedural, vetëm në ato raste, kur nuk ka persona të tjerë të përzgjedhur për të kryer rolin e përfaqësuesit procedural.

7. Kriteret që duhet të plotësojë një individ për të qenë përfaqësues procedural, janë:

a) të jetë shtetas shqiptar;

b) të ketë diplomën e studimeve të larta Bachelor dhe Master Shkencor ose Master Profesional në shkencë sociale, juridike, psikologji, sipas legjislacionit në fuqi për arsimin e lartë, lëshuar nga institucioni i arsimit të lartë, brenda apo jashtë vendit, të njohura nga ministria përgjegjëse për arsimin;

c) të ketë minimalisht 2 vjet eksperiencë pune të mëparshme në çështje të mbrojtjes së të drejtave të fëmijës;

ç) të ketë trajnime në fushën e mbrojtjes së të drejtave të fëmijës;

d) të ketë njohuri mbi rregullat e zbatueshme për drejtësinë penale për të mitur;

dh) të mos jetë dënuar me vendim të formës së prerë për vepra penale dhunë në familje dhe vepra penale kundër personit të kryera me dashje.

8. Përfaqësuesit proceduralë pezullohen nga detyra kur ndaj tyre fillon një procedim penal për vepra penale të kryera ndaj të miturve ose kur ata akuzohen për kryerjen e një vepre penale në bashkëpunim me një të mitur.

9. Kryetari i Bashkisë me propozim të drejtuesit të Njesisë për Mbrojtjen e Fëmijës, përpara hartimit të listës me përfaqësuesit proceduralë sipas pikës 4 të këtij udhëzimi, shpall thirrjen

publike në faqen zyrtare të bashkisë dhe Buletinin e Njoftimeve Zyrtare të Republikës së Shqipërisë, për të ftuar personat e interesuar për të ushtruar rolin e përfaqësuesit procedural për fëmijët në konflikt me ligjin, fëmijët viktimë apo dëshmitarë në procesin penal.

10. Thirrja publike qëndron e hapur për një periudhë prej 30 ditësh nga data e shpalljes. Njësia për mbrojtjen e fëmijës kujdeset që të njoftohen individë të interesuar, që plotësojnë kriteret e përcaktuara në pikën 7 të këtij udhëzimi, si dhe organizatat jofitimprurëse që punojnë në fushën e të drejtave dhe mbrojtjes së fëmijës.

11. Kandidatët e interesuar dorëzojnë pranë njësisë për mbrojtjen e fëmijës të gjithë dokumentacionin e mundshëm që vërteton përmbushjen e kriterëve të përcaktuara në pikën 7 të këtij udhëzimi, si dhe deklarojnë adresat dhe të dhënat elektronike të kontaktit të tyre.

12. Afati për dorëzimin e dokumentacionit pranë njësisë për mbrojtjen e fëmijës është 5 ditë nga përfundimi i afatit 30-ditor, të përcaktuar në nenin 10 të këtij udhëzimi.

13. Brenda 5 ditëve nga përfundimi i afatit 5-ditor, të përcaktuar në pikën 12 të këtij udhëzimi, kryetari i Bashkisë ngre komisionin për përzgjedhjen dhe vlerësimin e kandidatëve për të ushtruar rolin e përfaqësuesve proceduralë. Komisioni kryesohet nga drejtori i strukturës përgjegjëse për shërbimet shoqërore në bashki dhe në përbërje të tij janë:

- a) drejtuesi i njësisë për mbrojtjen e fëmijës në bashki;
- b) dy punonjës të njësisë për mbrojtjen e fëmijës në bashki;
- c) një psikolog, i caktuar nga urdhri i psikologut;

ç) një përfaqësues nga çdo organizatë jofitimprurëse që merret me çështje të të drejtave dhe mbrojtjes së fëmijëve dhe ushtrojnë veprimtarinë e tyre në territorin e bashkisë. Organizata jofitimprurëse, punonjësit e së cilës kanë aplikuar për të ushtruar rolin e përfaqësuesit procedural, përjashtohet nga gjykimi i këtyre kandidaturave.

14. Procedura për vlerësimin dhe përzgjedhjen e kandidatëve për përfaqësues proceduralë zhvillohet në dy faza. Faza e parë e vlerësimit e cila zgjat jo më shumë se 10 ditë, konsiston në shqyrtimin dhe verifikimin e plotësimit të dokumentacionit, që vërteton përmbushjen e kriterëve formale të përcaktuar në pikën 7, të këtij udhëzimi dhe vlerësohet maksimalisht me 70 pikë.

15. Komisioni përzgjedhës, pasi kryen verifikimin për përmbushjen e kriterëve të përcaktuara në pikën 7 të këtij udhëzimi në bazë të dokumentacionit provues të depozituar nga kandidatët, i njofton ata për rezultatet e fazës së parë të përzgjedhjes, si dhe për arsyet e skualifikimit, në rrugë shkresore dhe elektronike, jo më vonë se 10 ditë nga përfundimi i afatit sipas pikës 14 të këtij udhëzimi.

16. Kandidatët të cilët nuk janë kualifikuar për të kaluar në fazën e dytë të përzgjedhjes, kanë të drejtën e ankimit brenda 3 ditëve pranë komisionit përzgjedhës.

17. Pas shqyrtimit të kërkesave ankimore të paraqitura, komisioni përzgjedhës njofton kandidatët që kanë paraqitur ankim, për rezultatin e ankesave të tyre brenda 5 ditëve nga depozitimi i kërkesës ankimore.

18. Faza e dytë e përzgjedhjes zhvillohet brenda 3 ditëve nga momenti i përfundimit të afatit 5-ditor të parashikuar në pikën 17 të këtij udhëzimi. Në këtë fazë komisioni përzgjedhës zhvillon intervista me gojë me kandidatët, të cilët kanë rezultuar fitues në fazën e parë, ku vlerësohen në lidhje me njohuritë, aftësitë, motivimin si dhe eksperiencat e mëparshme të tyre. Totali i pikëve për këtë fazë është 30 pikë.

19. Kandidatët, të cilët nuk janë kualifikuar pas fazës së dytë të vlerësimit, kanë të drejtën e ankimit brenda 3 ditëve pranë komisionit përzgjedhës.

20. Pas shqyrtimit të kërkesave ankimore të paraqitura lidhur me rezultatet e fazës së dytë, komisioni përzgjedhës njofton kandidatët që kanë paraqitur ankim, për rezultatin e ankesave të tyre brenda 5 ditëve nga depozitimi i kërkesës ankimore.

21. Pas përfundimit të procesit të përzgjedhjes, komisioni përzgjedhës, brenda 5 ditëve, shpall në faqen zyrtare të bashkisë dhe në Buletinin e Njoftimeve Zyrtare të Republikës së Shqipërisë, listën e kandidatëve fitues të renditur sipas pikëve totale të fituara nga secili prej tyre.

22. Komisioni përzgjedhës, për çdo mbledhje të tij, mban procesverbalin përkatës, në të cilin përcaktohet data dhe vendi i mbledhjes, anëtarët që morën pjesë, një përmbledhje të diskutimeve të mbajtura në mbledhje, vendimet që u morën, forma dhe rezultati i votimeve. Procesverbali mbahet nga njëri prej anëtarëve të komisionit, i cili luan edhe rolin e sekretarit të komisionit.

23. Përfaqësuesit proceduralë të zgjedhur e ushtrojnë funksionin e tyre për një periudhë 3-vjeçare, me të drejtë rikandidimi një herë.

24. Njësia për mbrojtjen e fëmijës në bashki, pas hartimit të listës me përfaqësuesit proceduralë, sipas pikës 4 të këtij udhëzimi, e dërgon atë pranë strukturave vendore të Policisë së Shtetit, Prokurorisë dhe gjykatës së rrethit e të apelit përkatës.

25. Fëmijës në konflikt me ligjin, fëmijës viktimë apo dëshmitar në procesin penal, i caktohet përfaqësuesi procedural nga lista e njësisë për mbrojtjen e fëmijës të bashkisë, ku ai ka vendbanimin apo vendqëndrimin.

26. Agjencia Shtetërore për të Drejtat dhe Mbrojtjen e Fëmijës dhe Njësia për mbrojtjen e fëmijës në bashki zhvillojnë trajnime për personat që ushtrojnë funksionin e përfaqësuesit procedural.

27. Ngarkohet Ministria e Shëndetësisë dhe Mbrojtjes Sociale, Ministria e Drejtësisë, Agjencia Shtetërore për të Drejtat dhe Mbrojtjen e Fëmijës, strukturat për mbrojtjen e fëmijës në nivel vendor për zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTËR I SHËNDETËSISË
DHE MBROJTJES SOCIALE
Ogerta Manastirliu

MINISTËR I DREJTËSISË
Etilda Gjonaj (Saliu)